

從北京圖書館
平津閣本轉抄

壺山四六

宋方大琮著
全卷

壺山四六全

承抄壺山四六表冊共字畫萬八千七百零四每千之
鈔費大洋貳毛共計洋叁元七毛四光正此呈

清史館

張先生

台核

李華亭領據

十三年八月十一

善本

欽定四庫全書

集部四

壺山四六

別集類三

南宋

提要

臣等謹案壺山四六一卷不著撰人名氏考南宋文士號壺山者有四其一為宋自遜字謙父方回瀛奎律髓所謂謁賈似道獲楮幣二十萬以造華居者也其一為徐師仁字存聖所著有壺山集七十卷見于續文獻通考

其一為黃士毅字子洪自莆徙吳不忘故鄉因號壺山從學朱子嘗編類其語錄以行世者其一則方大琮也四人之中師仁事蹟已無考自遜為江湖遊客未嘗仕宦士毅則藉承師蔭列名道學亦非顯官惟大琮曾任閩漕而此集第一首即除福建漕謝喬平章啟其中所云竟坐非宜言之誅當伏不可赦之罪者亦與大琮疏論濟王被斥事蹟相符似

當為大琮所作第今所傳大琮鐵庵集為其
族孫良永等所編收入四六啟劄六十四首
多不與此相同而此本所收八十餘首其數
轉浮于本集良永等既加搜輯不應踈脫如
是其偶未見此本耶以其屬劉親切工於剪
裁當南宋駢體之中尚為佳手疑以傳疑姑
附錄于鐵庵集後以備參考云爾乾隆四十
九年閏三月恭校上

提要

總纂官臣紀昀臣陸錫熊臣孫士毅
總校官臣陸費墀

欽定四庫全書

壺山四六

謝除授

除福建漕謝喬平章

去國食祠甫滿鏡湖之考起家子節俾榮壺嶠之行銘
心知密啟之功揣分有踰涯之懼敬裁副墨少敘中丹
伏念某本無技能何足位置值清時之更瑟紛髦士之
彈冠幸從羈旅以登朝惟有靖共而在位呂端拙鈍朝

士皆目以糊塗鄒浩寬平朋儕或疑其隱默何圖誤屋
驟被親除念不為宰相則為諫官亦平居之所學苟上
畏天刑下畏人禍將得罪於此心不揆狂愚稍殫底蘊
亦頗增損時賢之論非有忖量明主之心上方從諫以
如流已實積誠之未至所期寤意乃類轉喉豈無嬰龍
領之疑又拜立螭頭之寵辭受之間不自決裂進退之
義殊欠分明低回久之愧負多矣每漉懇忱而祈去輒
蒙造化之苦留感時事以自驚果人言之弗恕其在漢

法蓋作非宜言之誅使遇唐宗猶得不可赦之罪尚寬
斧鑕俾食斗升佩吾君吾相之生成尋某水某丘而藏
伏未湔舊戾忽冒新榮將粉部之轉輸峻木天之論撰
負弩而除道路平生素陋於相如埋輪而止驛亭今日
妄希於孟博徒慚小己莫報大恩茲蓋伏遇某官柄國
親臣經邦魁宰友尚父阿衡於十載壽皆過於百年合
晉公郭令而一人功永垂於萬古捐身當宗社之治亂
動足係世道之重輕未能釋風雲之勞特將寬宵旰之

慮閔朝家局面之屢變獨人才氣脈之僅存方將扶植
於無窮忍使孤危而不保起之流落假以光華第其不
能深藏其是浪出無健力何以任澄清之寄無巧算何
以優餽餉之功虛煩陶成必誤器使維駒維騏維驪維
駱知難勝使者之華非熊非羆非虎非彪願亟正師臣
之拜

謝李丞相

拜鏡湖之號甫滿食祠榮繡社之行誤叨予節自憐小

器倍費大鈞敬牋草野之危衷上瀆翹材之穹聽伏念
某品流最俗位置素卑蚤歲受知不過言語文字之習
中朝借譽亦惟米鹽金穀之長凡妄意於彈冠一歸功
於推轂稍加顯拔積愧僥踰退之只宜著於儒黌子雲
分當老於天祿不圖誤聽驟被親除力不勝衣假以抨
彈之任語難出口責其繩糾之忠將何尺寸之能少效
萬分之報獨少也請聞於師友謂此非閑漫之官曹方
思敬王而與言豈敢量主而後入積誠未入寤意轉難

狂若仲淹真負晏公之薦勲如蘇軾幾貽安道之危賴
深知其無他非大過則不棄兩年玩愒一力保全竟坐
非宜言之誅當得不可赦之罪猶援之於蘼粉顧謀爾
以稻粱隱吏山中幾於響絕故人天上屢以書來據槁
得眠者甚安飢蔬沒齒其何憾未湔舊戾忽被新榮將
輸假粉部之光論撰峻木天之直無子駿所長之一技
與君謨相望於百年寵踰晉吏之起家華甚漢上之人
冢可仕可止亦了了以奚疑不進不休乃惓惓而至此

茲蓋伏遇某官擎天柱石醫國參苓防佞幸杜私門深
絕魚仇之禍抑詭怪暢皇極潛消牛李之萌興念孤危
久淪冗散逆鱗大罪金雞已賜於赦除駕牡麗官木牛
試資其轉餉所以寓褒職之補豈徒曰布衣之私第某
三瀆是虞一出太驟上褻於千名器下愧負於簡書有一
刺史之榮無刺史之難敢發郢州之歎知大人之真愧
大人之厚空哦清渭之詩

謝史丞相

叢祠丐滿嬾春乞於鏡湖單傳疏榮俾晝待於錦里光
生閭巷恩出廟堂伏念某羈旅登朝迂疎去國雜端論
罪欲加斧鑕之誅君相隆寬尚被斗升之食江湖迹晦
朝市志荒比退士之有盟已散人之無勅忽聞予節莫
遂循牆高卧已便著衣裳而顛倒好閑成癖聞車馬以
驚猜雖木天論撰之職優而粉部將輸之寄重昔在慶
厯君謨有氣節聲譽至淳熙子方以廉介選皆鄉人之
善者豈俗吏之云乎曾謂么微亦叨臨遺茲蓋伏遇某

官鹽梅家學喬木世臣陝而東是在周公茂著旂常之
績河以南行為晉土式遄袞繡之歸方將翕受敷施而
來羣才忍以小過微文而棄一士收之流俗假以光華
某敢不宣布教條謀求民瘼責功能之來效贖狂瞽之
往愆相國知子當若為而報效王事靡盬其敢憚於驅
馳過此以往罔知攸措

謝游參政

伯

伏遇某官學者泰山國之元氣感理亂安危之變務推

廣於上心處倚伏消長之機最勤拳於善類有如流落
雅辱矜憐於或語或默之間有不進不休之意貴以驅
馳之太效贖其狂瞽之往愆第某三瀆是虞一出太驟
昔歎散人之無勅今煩逋客之移文獻相國書乎知非
由於祈懇遣使臣禮也豈無望於存全

上同平章

謝范樞密

鏞

伏遇某官夾邦碩輔經世元勲閫內機謀何止霸越人
之國胷中兵甲自然寒西夏之心方將大建於功名亦

必旁收於冗散記憶螭坳之舊光華牡駕之行首末同史相

謝薦舉

謝李尚書舉自代

性傳

將招軺軒殊負錦游之媿露章橐座有幸袞字之褒其
知我哉莫累公否若稽前哲深感盛心介為時論所喧
雅見稱於永叔軾陷深文之久獨受薦於景仁蓋深知
從古之難逢而衆惡非賢之莫察豈特接連於氣類固
將扶質於孤危伏念某質弱氣卑才凡識闇少也處鄉